

Poštovani roditelji, poštovani staratelji/skrbnici,

obraćam Vam se s neobičnom molbom i apelom. O samom koronavirusu (Covid-19) ne moram Vas informisati – trenutno naši mediji detaljno izvještavaju o tome.

Ovim svojim obraćanjem želim skrenuti pozornost prije svega na Vašu djecu i Vaše porodice/obitelji. Time želim s jedne strane zaštititi naše učenice i učenike, a s druge strane svima nama omogućiti koliko-toliko normalno funkcionisanje. Međutim, za to mi je potrebna i Vaša pomoć i podrška.

Savezna vlada je jučer donijela razne mjere za suzbijanje koronavirusa koje se prije svega odnose na školski sektor. Glavna svrha ovih mjera je da se zaštite svi oni koji su izloženi većem riziku teškog obolijevanja od koronavirusa. Te mjere međutim mogu samo onda biti učinkovite i uspješne ako svi udruženo djelujemo prema istom cilju.

Zavisno od uzrasta Vašeg djeteta, do početka uskrasnih praznika imam sljedeću molbu:

Ako je Vaše dijete učenik ili učenica osnovne škole, nove srednje škole, nižih razreda gimnazije ili specijalne škole, onda od srijede, 18. marta/ožujka 2020. do početka uskrasnih praznika neće imati redovnu nastavu. Ako je moguće, molimo Vas da dijete ostane kod kuće i da se neko kod kuće o njemu brine. Ako ne možete organizovati da se kod kuće neko brine o djetetu (ako radite u nekim kritičnim sektorima, prije svega u zdravstvu, na području sigurnosti, u trgovini prehrambenih namirnica i saobraćajnoj/prometnoj infrastrukturi ili ako ste samohrani roditelj), onda Vaše dijete može i dalje posjećivati školu. Tamo će se pomoću dopunskog materijala vježbati i produbljivati znanje iz već obrađenog gradiva.

Ako je Vaše dijete učenik ili učenica viših razreda gimnazije, neke više škole usmjerenog obrazovanja ili srednje škole usmjerenog obrazovanja (npr. trgovačke škole ili strukovne škole), zanatske škole odn. politehničke škole, onda neće više imati nastavu od ponedjeljka, 16. marta/ožujka 2020. do početka uskrasnih praznika. Vaše dijete treba u tom slučaju od kuće ponavljati i produbljivati znanje iz već obrađenog gradiva. Škola će Vašem djetetu u te svrhe pružiti razne nastavne materijale – i u digitalnom obliku. Dolazak po materijale za vježbanje i produbljenje znanja odn. po dokumente koji su za to potrebni, bit će omogućen uz pridržavanje strožih higijenskih propisa.

U svakom slučaju izbjegavajte da se o djetetu brinu bake i djedovi (ljudi u rizičnoj dobi od otprilike 65 godina pa naviše), jer to su upravo osobe koje želimo da zaštitimo na najbolji mogući način.

Mogu Vas uvjeriti da Vaše dijete neće propustiti nikakvo gradivo ako ne ide u školu: Tamo će se samo produbljivati i ponavljati gradivo koje je već obrađeno.

Ukoliko imate bilo kakvih pitanja, molim Vas da se direktno obratite školi. Učitelji, nastavnici i profesori su i dalje na svom radnom mjestu i nastoje zajedno s nama savladati ovu vanrednu situaciju.

Odlukom da svjesno smanjite lične kontakte, dajete vrijedan doprinos tome da ljudi u Vašem ličnom okruženju ostanu zdravi.

Vjerujte mi: Ove prilagodbe koje se sada od svih nas traže, ni za mene nisu jednostavne. I ja sam otac i djed i znam šta tako ozbiljne promjene znače za svakodnevni život porodice/obitelji. Uvjeren sam međutim da sada zajedno moramo učiniti ovaj važan korak za našu djecu i ljude oko nas. Uvjeravam Vas da ćemo zajedno s pokrajinama i opštinama, direkcijama za obrazovanje i svim svojim podređenim službama potruditi se svim snagama da što bolje savladamo naredne sedmice!

Ključne tačke donesenih mjera naći ćete u **Dekretu za postupanje u obrazovnom sistemu vezano za koronavirus** na stranici [www.bmbwf.gv.at/corona info](http://www.bmbwf.gv.at/corona_info). Pod ovim linkom naći ćete i svakodnevno ažurirane informacije o toj temi.

Uz najljepše želje i zahvalnost na Vašoj saradnji srdačno Vas pozdravljam!

Vaš

Heinz Faßmann